

Mer wonnten domols en Köln-Porz, minge Fründ un jetzige Mann un ich, un mer hatte nor ein Auto. Mer wore jo noch jung un do ging dat noch nit esu.

Ich moot morgens öm fünf Uhr arbeide un wollt met däm Auto us der Garage. Nor wor dat en ald Auto, bronze-färvige Ford Capri, un dä hatt su en Macke. Wa' mer dä starte wollt, moot mer eets de Motorhaub opmaache, entweder ne Schruuvetrecker oder ne Kuli en dä Vergaser dun, starte, Gas geve, domet dat Auto kom, un dann moot mer widder ussteige, dä Kuli widder rus, de Motorhaub zo, un dann kunnt mer lossfahre.



Ford Capri 2

No stundt dat Auto jo en der Garage un ich wor morgens fröh noch en Hektik. Dat klappten och all. Dat Auto startet un ich gew' Gas un fahre rückwärts un hatt vergesse de Dür zozemaache. Dann gov dat ene Rumms un die ganze Finster met Schirve un allem wor drusse.

Dann denk ich: "Dä! Dä weed jo schänge, wann ich dä jetz wecke gonn. Et es jo noch fröh." Ävver ich moot im dat jo sage. Un tatsächlich säht dä för mich: "För su e bessche do wecks do mich? Naja! Es jo nit esu schlemm."

Ävver dat Auto broht jo en neu Dür un mer hatte jo nit vill Geld. Alsu si' mer nohm Schrottplatz gefahren un han dann geluurt, dat mer do irgendwie en Dür renkrähte. Jetz gov et ävver die bronze Färv ni' mih. Alsu kräht dat Auto en metallic lilla Dür. Do si' mer dann de ganze Zigg noch met erömgefahre, bes mer uns e neu Auto hatte kaufe künne.

Leichsenring, Andrea (71): *Der kapodde Ford*

ʔalso mə vɔntŋ dɔmɔls ʔɪn kœln pɔɐxts miŋə fɪvnt ʔɪn jɛtsijə man ʔɪn ʔɪç ʔɪn mə haten:uɐ ʔain ʔaʊto mə vɔ:bən jɔ nɔx jɪŋ: ʔɪn: da jɪŋ dat nɔ nid_əzu: ʔɪn ʔɪfj mo:t moɕjəns ʔɪm fynəf ʔuɐ ʔaʁbɛɪdɐ ʔun bɛn mɛt:ɛm ʔaʊto vɔlt_ɪfj ʔʊs dɛ gəʁa:ʃ nua ʔe vɔ dad_ŋ ʔalt ʔaʊto nə bɔŋzə fəʁbənə fɔxt ʔka:pɪ ʔɪn: dɛ hate zu_ŋ makə vɛ mə dɛ ʃtaxtən vɔlt mo:t mə ʔe:ʃi ʔmo:təhaʊp ʔopma:xən ʔɛnt've:dɐ nə ʔʃu:vɛtʁɛkə ʔodɐ nə ʔkʊli ʔɛn dɛɕ fɛja:zɐ dɔn ʃtaxtə ja:s jɛvə damɛt ʔɛt ʔaʊto kɔ:m ʔɪ:n dan mo:tə mə vidɐ ʔʊsʃtɛɪjə dɛ kuli vidɐ ʁʊs dɐ ʔmo:təhaʊp ʃʊ: ʔɪn dan kunt mə lɔsfa nu ʃtɔnt:at ʔaʊto jɔ ʔɛn dɛɕ ga'ʁa:ʒ_ɪn ʔɪfj vɔ moɕjənts frø: nɔx ʔɛn ʔhɛktɪk dat klaptŋ_ɔx ʔal dat ʔaʊto ʃtaxtət ʔɪn ʔɪfj jɛf ja:s ʔɪn fa:ʁə ʁɪkvɛɐʃt_ɪn hat fɛjɛsɐ di dy:ɕ ʔʃo:ʃsɛma:xə ʔɪn_an jɔ:f dat_ənənə ʁʊm's ʔɪn di jantʃə fɪnstɐ mɪt ʃɪʁvə ʔɪn ʔaləm vɔ dʁʊsə ʔɪn: dan dɛŋg_ɪfj dɛ: dɛ vɛ:t jɔ ʃɛŋə vɛn_ɪfj:ɛʃ dɛ. vɛkə jɔn ʔɛd_əs jɔ nɔ fɪʃ ʔɪn ʔɛvə ʔɪfj mo:t jɔ: mo:d_ji:m dat jɔ za:ʁə ʔɪn ʔa:ʃtɛŋɪfj sɛt:ɛ fə mɪfj fə zu jɛt bɛsjə dɔ vɛks to mɪfj naja: ʔɛs jɔ nit_əzu ʃlɛm ʔa:ba dat ʔaʊto bɔ:t ja_ŋ:øɪ dy:ɕ ʔʊ_mə hatə jɔ nit fɪl jɛlt ʔalzu zɛ mə nɔm ʔʃɔtʁɪʃt jɛfa:bən ʔɪn han dan jɛlu:ɐt dat mə dɔ ʔəʁəntvi_ən dy:ɕ ʁɛn'kʁɛ:tə jɛʃ jɔ:v_ət ʔɛvə di bɔŋzənə fɛʁf ni mi ʔalso kʁɛ:t:at ʔaʊto ʔən mɛ'talɪk ʔlɪlənə dy:ɕ ʔɪn da zɪmɛ dan dɛ jantʃə ʃɪk nɔx mɛd_ə'ʁəmjɛfa:ʁə bɛs mə ʔʊns_ə nɔɪ ʔaʊto han kaʊfə kʏnə

